

պատին վրայ հաստատուած շղթայով մը կը կապուին և ալ չեն կրնար շարժիլ (P. E. F. 1896, էջ 217):

Փելլիքս Ֆապրի ուղեգիրը կը պատմէ թէ Ս. Գէորգի եկեղեցիին մօտ խոշոր քար մը կայ որուն վրայ կը տեսնուին սուրբին ձիուն հետքերը զոր ցոյց կուտան վանականները: Ուխտաւորներուն ցոյց կը տրուին աւ շղթան՝ որով Ս. Գէորգ կապուած է: Անոնք կը համբուրեն զայն և իրենց պարանոցին վրայ կը դնեն բարեպաշտութեամբ: Սարակինոսներն ալ կը յարգեն սուրբին քարը և շղթան (P. T. S. Գ. մաս, էջ 203):

Իսլամները այնչափ կը յարգեն Ս. Գէորգը որ Պաղեստինի իւրաքանչիւր գաւառի մէջ շատ մը սրբավայրեր անոր նուիրուած են: Պաղեստինի ժողովրդագրութիւնը (folklore) ծառ մը կ'ընծայէ այս սուրբին: Անգամ մը խմելէ յետոյ կենաց ջուրը, այսինքն միակ ջուրը զոր ան կը խմէր, խմածին մնացեալ կաթիլները կը թափէր դրացի ծառի մը վրայ որ փշոտ տաձենի մըն էր, և որ մինչև հիմակ կանաչ կը մնայ եւ անփուտ (J. P. O. հատ. ԺԳ. թիւ 3, էջ 174-175):

2. Բեթղեհէմէն Քերրոն զալու ժամանակ անցնելով քանի մը վայրերէ՝ որ քրիստոնէական աւանդութիւններ չունին, ուղեւորը կը հասնի Ս. Փիլիպպոսի աղբիւրը:

Գործք Առաքելոցի մէջ (Ը. 26-39) կը կարգանք թէ Փիլիպպոս աւետարանիչը Եթովպիայի կանգակայ տիկնոջ ներքինին քրիստոնէութեան կը դարձնէ եւ կը մկրտէ: Անոր մկրտուած աղբիւրին անունը աւանդութեամբ մինչև հիմակ կը կոչուի Ս. Փիլիպպոսի աղբիւր: Այս աղբիւրը կը գտնուի Բեթղեհէմէն Քերրոն երթալիք ճանապարհին եզերքը, ձախին առաջաջուր աղբիւրի մը՝ որուն ջուրերը կը հաւաքուին